

Vinko Hasnek

ZLATNA REČ

Sveti Ivan Zelina,  
svibanj 2020.

Mala biblioteka  
»Dragutin Domjanić«  
knjiga 103.

*Nakladnik*  
Pučko otvoreno učilište Sv. Ivan Zelina

*Za nakladnika*  
Vesna Bičak - Dananić

*Urednik*  
Dr. sc. Ivo Kalinski

*Grafičko-tehnička priprema*  
Ivica Kukovačec,  
Vector Design d.o.o., Sv. Ivan Zelina

*Tisak i uvez:*  
Tiskara Zelina d.d.

CIP zapis je dostupan u računalnome katalogu Nacionalne i  
sveučilišne knjižnice u Zagrebu pod brojem 001063559.

ISBN: 978-953-6540-89-1

Vinko Hasnek

**ZLATNA REČ**

*Ljudi glediju z očimami  
a Angeli z srcem*

# Kazalo

## *Predgovor*

Ivo Kalinski:

ZLATNA REČ Vinka Hasneka IX

## *Zlatna reč*

Zlatna reč	13
Da mi tebe nije	14
Zreči!	15
Živa voda	16
Srečni žitek	17
Novi žitek	18
Pelanje	19
Duša	20
Drijeve škripi	21
Dopeljaj mi pajdaša na sprevod	22
Pot krej našeg groblja	23
Vu krivem pravcu	24
Svetleče luči	25
Zdenecova popevka	26
Letne povodnevj	27
Vu čkomine noči čula jakša od sna	28
Naš strplivi japek	29
Razčerupane šare perje	30

## *Svetleča lica*

Svetleča lica mej zvezdami	33
Jutre vu radosnem mesecu nadelovanja	34
Pofurena zemla	35
Fkanjena zemla	36
Kak ga nesam prepoznal	37
Vu kaj si se zagledel	38
Ftice	39
Htel bi živeti	40
Sreča	41
Je li ima kaj	42
Muva	43
Sponjene želje	45
Poni mesec	46

## *Do konca veren Jezušu Kristušu*

Do konca veren Jezušu Kristušu	49
Rože naše vu tebi	50
Pušlek rožic	51
Zmed nakovanja i kladivca	52
Bela flaka na drogu	53
Neoskvrnjena	54
Vreme se pohamile	55
Patrona za srečne pelanje	56
Nepozableno cvetje	57
Stijen goreči	58
Vali se valaju	59
Posedovati vupanje	60

Melini meleju	61
Spomenek žitka	62
Podragane hridine	63
Proščenari	64
Lampaš	65
Kak nam Bogek da	66
Zahvalna steza	67
Razdragani cajti	68
Draguvolne sebedarje	69





# Predgovor

## ZLATNA REČ Vinka Hasneka

Od prve objavljene zbirke *Zdroblena idila* (1995), druge *Den prije, Golubica* (2006), treće *Pregledavanje albuma* (2014) do ove četvrte *Zlatna reč* (2020) Vinko Hasnek uporno, premda s višegodišnjim razmacima, ispisuje svoju pjesničku putešestviju. Ta je putešestvija u svim dosad objavljenim zbirkama i tematski i rječotvorno jedinstvena - oblikovana leksičkim bogatstvom kajkavštine, i to onog njezina dijela koji se prije svega veže uz donjoglavnički kajkavski govor, u širem smislu uz kajkavsku jezičnu i govornu podlogu *stare moravečke župe*. Tematski se pak, kao i u prethodnim zbirkama, svodi s jedne strane na još snažnije produblјivanje poopćenih intimnih pogleda i razmišljanja (*Stara majka zdihaule/Kot i kam iti ne zna/Zagubila se*), a s druge strane još predanije marijansko/marijološkom i sakraliziranom kompleksu poetskog čina.

Ono što bi se pak moglo uočiti kao stanovita *sakralizirana novost* bilo bi upućivanje na sam stvaralački čin, naime na *Riječ (na paperu si/vlovljena/sad Te imam/REČ/ZLATNA REČ)*. Takva slična sakralizacija bude i u pjesmi *Zreči! (Zreči strplivu jasnoću/dušom srcem vdehnuti reč)*, također u mnogim drugim manje uočljivim.

Hasnekova poezija nema sonetnih formi, nema ni rime. Radi se naime o *pjesmotvornim naracijama*, o poetskim pričama u kojima manevriraju različita lirska suzvučja, bez obzira na slobodniju ili manje slobodnu formu, bez obzira

na trociklusna imenovanja pjesama unutar zbirke: *Zlatna reč, Svetleća lica. Do konca veren Jezusu Kristušu.*

U svim se ciklusima proteže opisna komunikacija, s naglašenom slikovitosti, ponekad s više, ponekad s manje afektivnosti, ponekad s više, ponekad s manje uznositosti (*Žeđen/kak žarka pustinja vu pesku/duša popevke želna*).

Iako je primijetiti da su mnoge pjesme motivacijom, tematikom i stilski „reciklirane” - valjda zato što one ispisane prije nisu obuhvatile sve one podatke koji su zamišljeni a nisu zbog nekih razloga ostvareni, isto je tako pohvalno sve ono što u svakom obliku donosi novinu kako je naprimjer u pjesmi *Muva (Muva/Sedim na postele/Več sam tri slojžil na pod/I nova atakera na komodu iza veckerice/Prešpancerala čes popevke/Vidim ju vu psihe)*.

Moglo bi se reći da općenito ovakva tipizacija autorova kajkavskog pjesništva, kao i suvremenog kajkavskog pjesništva uopće, osim svojeg statusa nastoji potaknuti i duh vremena u kojem živi - počesto životareći u društvenom kontekstu više kao simpatičan montažni mural a manje kao realan stvaralački život - što uopće ne znači da je na pogrešnom putu. Naprotiv! Bez pretenzije za kreativnim visinama između fizičkog i mentalnog položaja na području umjetnosti riječi, autor će jednakim marom nastojati dohvatiti svoje istinsko stvaralačko i simboličko mjesto.

Ivo Kalinski



*Zlatna reč*



## Zlatna reč

*V*lovil sam Te!  
vlovil sam Te!

Sela je  
Zagrizla si gruntnu vudicu  
pitaš me za sponjenu želju  
Ti si zebrana želja

Vutefteril sam Te na paper  
na paperu si  
vlovljena  
sad Te imam

REČ  
ZLATNA REČ

## Da mi tebe nije

*Žeđen*

kak žarka pustinja vu pesku  
duša popevke želna  
vu dogemi zimskemi cajti  
gda vane zdeni veter smica  
z svržmi kočil po hižnem zidu  
a mi sme bili napeta vuha

Žeđen  
sceden  
da mi Tebe nije

Žeđen  
sok grojzda sceden  
da mi Tebe nije

Zdaj nas nove nebe grije  
zdaj nas nove nebe grije.

## Zreči!

*Z*reči strplivu molitvenu jasnoču  
dušom sercem vdehnuti reč  
dašek ljubavi donesti  
jasnoču govorenja  
blagem dahem po zemle

I cujzeki pred rudem kaskaju  
i telek popleče blaščetu pud nogami

Čerlena lopta na obzorju stoji  
pokošene sence ledične diši  
Molitel nodi zaraščenu ranu

Vuskladena reč odleprša mladeletešnem obedu  
kak lahorek z blagem dahem po zemle.

## Živa voda

*Tepati*

rad imeti  
fanja bistra voda  
vu steklu  
kak na zviranjku  
orosila se  
drobne kristaliče  
kak da sipi

Vu kupice  
dvije točkice kak dva okeca  
sredi slatki balončić

Gledimo se  
zememo se  
ishajamo z vode i duha  
zapometimo tepanje  
nodimo se  
pijeme živu vodu.



## **Srečni žitek**

*Srečni žitek:*

lepa milostiva reč  
obložena čkomina  
poštivanje dogovarjanje  
poslušanje njegovoga gruntanja

Mirne prijetanje  
novega gruntanja.

## Novi žitek

*V*u svetu ljubavi  
zemalska stvorenja  
pratiju ljudska zagađenja

Za jezero milijardi let  
bode sprhla  
obrnula bode se  
prevrnula  
prekupitnula

Vu novem svetlu znovič bude se obgrela  
vu nove ljubavi  
več nebu brige  
nit kaštige  
zemplani  
vu nove žitke  
idu.

## Pelanje

*P*elam se

Starem poznatem putem  
Vu gruntanju negdašnje hižice  
Gledim stara polja senokoše

Serce razgalile se  
Kulike puot  
Preputuval ž nim  
Bezбриžne  
Gledel dvorišča, gledel ljude

Zestajal blage na pašu i z paše  
Zestajal školu  
Pustim soze radosti na volu  
Lefko bezбриžno peljam se  
Poslušam vugodne popevke  
Nevugodne vesti z sveta čujem  
Nikam nejdem  
Peljam se.

## Duša

*Međaši* i šuma glediju te  
Kola pona idu krej tebe

Konjeki rastegnuli se  
kak dogi i kak široki  
duša sedi na koli  
smiri se serce  
Nemaš kam!

## **Drijeve škripi**

*P*o glasnoče  
Po jasnoče  
Dreve ruši se  
A neje se zrušile  
Škripi, a vetra ni

Kante pelam demom  
Na naše mekote  
Šume stojiju usuvički  
Stara majka zdihavle  
Kot i kam iti ne zna  
Zagubila se

## Dopeljaj mi pajdaša na sprevid

Ob petnajste vure

Tot komora steklena stjena  
Odar, ljes zamečen z vjencima i cvetjem  
Zamečen slovima, zamečen rečima,  
Zamečen ljudima.

Pokojnik živ živcat na svojem sprevidu  
Držal vse pod kontrolu  
Z pajdašima kak za cajte aktivnoga življenja

Senj smrti našel nega to noč  
Vu te stare komorice  
Vu tere imel gosti gda se ženil

Stuji i gledi prema jugu  
Komorica pregrađena steklenom stjenom  
Krej nega vu hiži neki nepoznati ljudi  
Slike obraza pokušava pokušava rezebrati  
Premeče vu glavi

Cvetje zametane z venci  
Spodi tega nešče nagleda se  
Pogled zastre človek z črnem škrakem  
Spremekne z jednoga kraja na drugi  
Čez stakleni zid ljudi glediju  
Vu senje pregrađene komorice

Trapjenje, odgonetavanje, pretrgne glas  
Telefon zove  
Dopeljajte mi pajdaša na sprevid negdo veli  
Denes op petnajste vure  
Vu ov grad popevki i KAJA  
Pomoli se  
Spusti slušalicu  
Ništ ne govori

## Pot krej našeg groblja

vsaki pot gda ga zalovi kesna vura  
vrača se demon krej našega groblja  
vu segurnosti pelja se kraj našega groblja

enda vuseti da ja nekaj želim ž nim  
pogled zdigne vu retrovizor  
ozbilnoga brončanoga obraza  
na zajnem zicu mojega auta sedi

tak skupa peljamo se  
po naše zemlice čez gorje

brončani me preveze preko mosta du šume  
pri stare hraste prijje međe  
zahvalom zide vun  
vu glave odnese me demon  
vu kmične tejne brez sna  
skupa obračamo se vu postelev

vu nami stara sejna  
zbudi se  
jutarnje sončece čez obluk.

## Vu krivem pravcu

Počel

Popletati stezom  
Na tuđu zemlu  
Maček zišel na stol z tenera

Šiba me pogladi po licu  
Trn zakopči rukav  
Drugi vleče kabanicu vu zrak

Spušča se mrak  
Vu doline obločeci svetliju

Okolo sebe obrnem se  
Zmislim se pokojnika  
Čija je ovo zemla

Vjeter me  
Pretrgne

Maček zišel na stol s tenera  
Vu krivem pravcu  
Odišle vse



## Svetleče luči

*M*rakem svetliju

Za luctve plamtiju

Jena balta teše

Železne roke po svetu vudiraju

Noseči plaven zdržavaju

Stesana luč čaka prižigača

Noseću roku

Za gureči plaven

Železne roke svetom vudiraju

Zemlena prašina vu pepele pepeli se

Goreča svetla tancaju

Jena roka zdiže svetleču luč

Sekire čepliju, čepliju, čepliju

Svetleče luči prtiju, prtiju, prtiju

Naš žitek, naša nada odhaja vu gliblinu

Človečanstve vu roka drži svoju sudbinu

Žarke svetleče luči po svetu svetliju

Železne roke vudiraju

Vudiraju

## Zdenecova popevka

*Z*dene zime

okoknjeni tragi vu blatu  
stiščeni vu zemlu  
okulu našega staroga zdenca

Človek snima ftičekovu popevku  
zdenec slika nebe  
vnoga duša nutre

Dečkarinec  
glavu nagnul  
kričeči glas zgublen  
vu gliboke tamnine

Povrneni cajt čkomine  
k njemu znutra nazaj  
Oblejal dušu  
vutažil serce

Raslinje zarasle naš život  
dečak je zdencuva jeka  
ništ drugo

Tje lete  
školarci naše škole dospomenuli  
spomenek na blage  
spomenek na trage  
spomenek na žitek

Vnoga duša vutažila žeju  
vnoga duša  
zablesnula se: pločica natpis i popevka.

## Letne povodnevje

*B*regi dišeju

Kak i husta diše  
Pokošene sence diši  
Letne povodnevje sprešle  
Razruvale pote  
Zglodale gliboki vodotok

K tomu se preprečil zrušeni jablan

Melinske kole brez vode  
Melini začkomeli  
Poti presečeni  
Zaprega ne more dalje

Z breguf žile se otprle  
Tečali  
Voda  
Prema našem domu

Zestavili se cajti  
Vu kotu stišnjena deca  
Glediju durcug  
Napuhani oblaki putujeju  
Na jug  
Nas zestavile naše brige  
Dosenjanji senji

O, srečna i dugovječna ljubavi.

## **Vu čkomine noči čula jakša od sna**

*Z*alajani hropec  
čkomina  
zorja poišče žitek.  
Snočkanja pozabljena odprta vrata  
Vu glavu ga pritišče.  
Klincu dvorišče i put nagleda čez obluke  
slike družinskoga spomenka prehajale  
polek njegve hiže  
kak i babičina priča  
z kravicami prti senjaka  
vu meter gliboki sneg.  
Na sana brez truge prepeljali se  
trupci pokriti z belom plahtom  
dečeca vu oči frlojba slika  
čez naše dvorišče  
polek naše hiže  
polek čkomečije zidov  
voda vu zdencu  
zdržava neiziskane dane  
vu nočne čkomine čula ne daju  
vusnuti senju.

## Naš strplivi japek

*V*saki den odhajali  
Od hižice zuran  
Staroga japeka z betegem  
Vu posteले samoga ostavlali

Japek!  
Kak ste zbavili cajte samine?  
Pajdaš japek ima strplenja  
Za cajt  
Napravil pericu na obrazu  
Souzu na licu  
Zdigel roku  
Zamahnul  
Nesam sam, rekel je  
Pogledal se vu psihi  
I nestal.

## Razčrupane šare perje

*P*opeljal se z polja na breg  
vu sunčane nedelne jutre  
vuz opuštajuču stezu, prema šume  
  
razbrušeni lasi na vetru šumenjaku

Samer lepota  
razbarušenoga šaruga perja  
puščana sredi domače steze.



*Svetleča lica*





## Svetleča lica mej zvezdami

*L*ažmirel

vupustil se  
žmahne vu naslonjaču  
Vsakojaka lica dohajala i prehajala  
mlada i nasmejana  
vsake lice svoje fele  
bijela i glatka i čista  
rudlavi lasi i vedre oči

Človeku dojde vsakumu  
Pušlek kušlecuv pritisnuti na lice

Zvezdane nebe  
Žarke svetleče lučice  
Prebraja  
Prešel paradižum.  
Lefkek kak perce  
žive živcate rože  
cvetem po našem polju

Vedrina se zgasila  
ostala praznina  
zaspal človek vu naslonjaču.

Za poniznost trijeba imeti reč.

Če češ biti jak, močen  
i pobednik budi ponizen.

Ljudi glediju z očimami  
a Angeli z sercem.

## **Jutre vu radosnem mesecu nadelovanja**

Cela zemla

Kak hiža obložena debelem stiropolem  
Vu bele farbe  
Potek zaleden  
Z nevidečega oblaka veter sneg prislagnival  
Voda pretekala ispod leda  
Vrbe i jalše  
Pri raspele pot othajal od poteka  
Dupli zavoј drugi vu leve spinal pri bregu  
Iza mene moje sele  
Dom, stanica, škola i raspele  
Pri zajne hiži negdo obrnul glavu vu dvorišče  
Moju staru glavu

Stara majka plakala se  
Vu bele vrbe  
Vu potek zaleden

## Pofurena zemla

*S*vetleči posvet visi nad zemlu  
lističje hišče svržovje  
vu mjelku zemlu crnicu  
raslinje po zemle  
brez reda trseke jemle

vu lubavi rasteju popevke  
drobne kamenje vu zemle  
stijene zdižeju vun

Protuletje zove toplinu na zemlu  
kukavica došla na zelenu šumu  
protuletje protuletje zemla cvete  
vočkicem listeki razvijaju se  
pope popaju  
njim se vun žuri, njim se vun žuri  
a mraz furi, furi i furi

Mjelka zemla kosti oblaže  
brez prazne ambalaže  
masnica štihaču prijemle  
piješčanka vodu pije  
človeček spitava kaj je čije

A mene nije  
a mene nije

## Fkanjena zemla

*S*uma nigdar nije sama  
pot kola čaka  
Ja idem. Ti ideš.

Trava se vija na vetru  
belzebubu brusiju kose  
Ja idem. Ti ideš.

Bregi postojano stojiju  
dišeju  
pokojnikova duša ne da se van  
sprevodnik zgovarja nečije ime  
Ja idem. Ti ideš

Vsaki naš pot spinja se  
i spušča  
lapor smica blate  
smrzavica te oblokava  
Ja idem. Ti ideš.

Otpuerta vrata nagledavaju se  
za onemi ki su zaostali  
sprevodnikov niodkud tuliko  
Ja idem. Ti ideš.

Zemla nas prearja  
fkanjena zemlica  
Ja bi još da idem.  
Ti bi još da idem.  
Vu nami molitva.

## Kak ga nesam prepoznal

*O*f striček na krovu leži  
Vu roke lončićek drži  
Ober nega drugi sriček  
Vubiral cvetje po našem polju  
Božje reči presađival z predikalnice  
Prenašal vutehu i nadu  
Gda nas žmefkoča tiskala vu zemlu

A striček kaj stoji  
Z jenom rokom platno drži  
Drugu zdigel vu zrak  
Dadi!  
To ti je tvoj pradjed  
Ki drži odoru naše hrvatske vrste  
To ti je naša hrvatska zastava  
O da sad znam  
Dobre kaj si me setil

Curica se smeje  
To je tvoja teca  
Ta ka ima šal na glave  
I črlenu jaknu  
Na slike mejša nek ti sad

Ovaj dečec na slike male vekši  
Ki igra vu vusnu ramuniku  
Tvoj je japek

Bože, kak ga nesam prepoznal.

## Vu kaj si se zagledel

Glediš vu tu sliku kak da si zanemel  
ljudi se zabavljaju  
Kakve želje imaš?  
Kakve planove imaš?

Oprosti dej da vidim kaj ti to glediš  
vu kaj si se zakopal

Kakve cvetje? To su velebitske degenije  
neje čude kaj si se tak jake zagledel

Nenametljiva toplina  
jagodice na ličeku ispupčene  
nosek podignut  
bradica smeje skup žnim  
iskreni ženski osmeh pun pouzdanja  
vusnice širem raširene  
svaki zubek za sebe smeje se  
svetli se čista koža lica  
Čije lice?

## **Ftice**

*N*a tem zemlenem potu  
komin ftajil se  
dreve poca

Oblaki plavaju i brodi plavaju  
vu deždu ljudi  
vu soncu ljudi

Letna doba dohajaju i othajaju  
cele lete paščiju se ptice selice

Po potu i kraju lečeju se pilari z banzeki  
gledi nas zdena zima  
šuma spominja listje z bukovoga i hrastovoga dreva  
mlade dišeče degenije keliju nam moždane

žitek spitava za peneze  
letna doba dohajaju i odhajaju  
cije lete ftice selice  
na tem našem zemlenem potu  
Ftice.

## Htel bi živeti

*H*tel sem živeti  
stvarati  
družiti se  
lubiti vse  
htel sem biti koristen  
potpirati dobre namere  
radost z vsemi veseliti  
žalost vu žalosti podeliti  
prednevati i popevati  
svoju misel zreči  
sanjariti  
smejati bi se htel

Ljudem dodvarati dobrim delima  
znalaziti nove olakšice žitka  
vsakojake savete poslušati  
koješta kušati  
dobre od lošega razlučiti  
kaj je smeti, kaj nije smeti  
prizival k sebi vse  
z semi družiti se  
htel z radošču žitka biti  
htel potomstve na svetu imeti

z stola gledela me rumena božičnica jabuka  
otišel sem vu popevku i vekovečni žitek.



## Sreča

*S*reča i nesreča su ljudi  
Sreču trijeba zbuditi

Sreču trijeba iskati  
Za sreču se trijeba postarati  
Sreču trijeba vloviti  
Z srečom trijeba šparati  
Srečom se nesme harati  
Sreču trijeba moliti  
Sreča su drage vuspomene  
Sreču nesmeš srditi  
Za sreču trijeba hoditi  
Za svoju sreču  
Sreču trijeba drugumu privušiti

Sreča  
poniznost skromnost  
sreča vu dobrem dnevnem rasporedu  
sreča nije sebična  
sreča človeka je vu drugome človeku  
Gda je znaš svoje mesto za stolem  
Sreča je dihati čisti zrak  
Mir vu cajtnem vremenu

## Je li ima kaj

*L*epe je imeti svoje roditelje  
Lepe je imeti svojo staru hižu  
Lepe je imeti svoj falačec zemle  
Lepe je imeti bezbrižne detinstve  
Lepe se je vračati z dalkoga pota  
Gda se imaš kam vrnuti  
Gda znaš da te pri domu čaka družina  
Zavičaj, orsag, lublena domovina

Lepa je poniznost i skromnost  
I ljudi ki te hočeju prijeti

Je li ima kaj fanješega?  
Je li ima kaj spametnešega?  
Je li ima kaj plemenitešega?  
Je li ima kaj vugodnešega?

Nek donesti na svet žive biče  
Je li ima kaj plemenitešega?  
Nek zasaditi dreve lubavi na zemlje  
Je li ima kaj vugodnešega  
Nek gda te popevka vu srcu podraga

Pušlek cvetja darovati  
Oproštajni kušlec pritisnuti  
Reč fale zreči  
Je li ima kaj vuzvišenešoga?

## Muva

*L*etna doba velikomešni mesec  
Vune žega žge  
Oblokna krila otvržnjena roleta spuščana  
Firunge rastegnute  
Od žege i vročine popoldnevni otpočivek  
Nekaj mi hodi po nosu  
Nelagodne špancera po licu  
Čes čele vu lasi  
Vugodni otpočivek sklapa oči  
Mašem kak da se hoću razladiti  
Prebronjđala je od firunge prema vurmardu  
Muva  
Hiščem pogledem  
Okrenem na desne plečne  
Slatki vumor sklapa kapke  
Krouži okolo lica  
Zaletava vu nosnu šuplinu  
Htela bi zajti vu vusta  
Enda krej vuha prebila je zvučni zid  
Brunjđi oko glave  
Zdigla se z zmužlanoga gujna  
Fpičila me ober prstov desne noge  
Zdigel sem levu petu, primeravam  
Vusetim zašla je mej lasi  
Muva  
Sedim na posteale  
Več sem tri slojžil na pod  
I nova atakera na komodu iza vekerice  
Prešpancerala čes popevke  
Vidim ju vu psihe.

Po starem lajdinu pregledava neke naslove:

„Republika“,

„Časopis Kaj“,

„Časopis za intelektualna i duhovna pitanja“,

„Kruh Nebeski“, „Nemir podvornika Szerbe“,

„Sokovi od svježeg voća i povrća“,

„Zdroblena idila“, „Štunderanja i zapisi“,

„Zdrava probava“,

„Natrag k zemle“,

„Veliki znak“,

„Osamnajsti recital Josip Ozimec došel bum v Bistricu“

Gda sem ove napisal

Zdigel sam roletu rasprel firungu

I pokazal pot kot more ziti

Muva

Eh, muva.

## Sponjene želje

*M*isel preganja žitek

Pritišče glavu vu zid

Jena želja zrodila pone želja

Znak dati kak

Z rečju ziti vun

Želje, želje

Znovič z hiže oženiti

Na svojem lesu čavle zabiti

Vu komorice na posteले zdehnuti

Veliš mi škrlak na glavu deti

Kak još sme vu cirkve

Posvet rasvetlil pomet

Senj komorice i nepozablene i prazne posteले

Nadeluvali nam žitek i veselje

Zahvalili človeku za sponjene želje.

## Poni mesec

Cajti slavlja

Popevke prelevaju vu nas  
Kak svetleče farbe bleskaju se  
Vu očima nam ogenj  
Ožarena lica ozbilnost  
Vu cajtu gozbenog veselja  
Vsi skup jeni do drugih

Radost zadovoljština pone serce  
Komu darovati okruglu mesečinu?  
Komu darovati poni mesec?  
Svetlost vu se zeti

Vune spelavaju se ljudi  
Vu nami čkomina kleči.



*Do konca veren  
Jezušu Kristušu*





## Do konca veren Jezušu Kristušu

Dečaki čakaju pred vrati  
cirkveni veronauk  
špinčiju se  
praviju važni  
premeščaju z čela kolone na začelje  
zadirktivaju  
bockaju  
gneteju se

Ki bili vu sredine  
našli se prvi za cirkvu  
mej tem tega dekile zideju vun  
verovučitel zide zajni  
dečaki se primirili  
dva po dva  
jeden iza drugoga

Muder prefrigan gospon verovučitel  
prešel vse verske i svetovne škole žitka  
govoril četri jezike  
od bivšeg orsaga dobil  
ponudu za atašeja vu strane orsage  
vse to odbil  
ostal veren do konca  
gosponu našemu Jezušu Kristušu

## Rože naše vu tebi

*Rože* naše vu tebi  
mi po svetu:  
pobirame, pospravlame ščehane svržičke  
raskolene naprluščene cepanice  
vu žmevkoče čkomine samine.  
Klečim prigiblem  
drvovje mečem pepel snimlem.  
Poslušam kak  
dumi, šumi, grmi,  
nada me draga  
veter šalaporkami nabija  
po žlebnaki tambura  
čes žlebe preceđa vodu.

Poslušam zjutra  
kokotiček popeva  
sveta vodica po nami se zleva  
čez obločec nagledam prognozu.  
Ščiple me gruntanje  
gda se bode dežd pretvoril vu snežek  
gda bode kamen omekšal  
gda bode led rastopil sunce  
gda bode s kamena zrased cvet.

Rože naše vu Tebi.

## Pušlek rožic

Čele po cvetju

mrmlice za medom na stol  
šršan pod svetleču lampu

Morske struje hiščeju  
plastiku i plastični odpad  
kultura hišče zastavu  
hišče se detela s četri lista  
morjem spreplečeju se morske struje  
kolne vode plavaju po Tvojem  
morju Gospone  
polsko cvetje vu sercu cvete  
kušleci i pušleki spuščaju se vu zemlu

voda lefko zašlupava obalne hridine  
pušlek rožic plava po morju.

## Zmed nakovanja i kladvca

*D*urame zmed posla i hrane  
Ljudi Boga  
Vjere i penez  
Kak ti  
Zmed nakovanja i kladvca  
Nigdar dosti dober  
Da bi vsem vugodil  
Sluga mej svojemi rojenemi.

Pratiju nas slabosti  
Kak mužikaši mlade na vjenčanje  
Ostvar pridelame sami.

Majčica velikodušne čaka.

## **Bela flaka na drogu**

*L*idem na balkon  
obešena flaka beli se  
kak se zmed oblakov beli nebe  
dežddevni vetri šinfaju staru mlaku

Ciferšlus pohaban  
kmica z brega  
preoblečena vu mrzli zrak

Vetri mlatiju po obešene bele flake  
proščenari su vu Tebi.  
skup z nami  
kak i bela flaka na drogu.

## Neoskvrnjena

*Z*abigmeral  
nacentrelal  
podlekel  
prekoračil  
nahitil

Ajfung prnjki visiju  
rijekla handra šišak  
vu vrpe kamenja  
raziđeni zidi  
iza oblaka čučí svetlost  
Ti na kamene  
z rožami obložena  
Neoskvrnjena.

## Vreme se pohamile

Vu kapelice polden zvoni  
na bregu  
sedečki naklučen  
lakti na koleni  
čele vu ruka

Vu mirnem cajtu  
celi žitek prepeljal sem čez glavu  
Angel gosponuv z menom

Napuhale se i nacurele  
namlatile z saduvjem  
parluš odnesel širem  
vu druge kraje  
i furt traje  
i furt traje.

## Patrona za srečne pelanje

*S*vetla nas peljaju  
mrak curi  
bankina vu duši  
vuz cestu nestašna deca

Tebe cajt leknuł je  
ponizne vu sercu pokleknul  
koga vrazil-jeknuł

Z talamusa zišla Patrona nebeska  
milosti pona  
za srečne pelanje  
k obavlenuom zadatku  
z sebum i tebum  
donesti radost k družine

Skupa vu tebi popevka  
i cvetje tera cnete vu gruntuanju  
našem.



## Nepozableno cvetje

*V*saki cvetek  
kak i vsaka popevka  
ima svoj početak i svoj konec.

Konci dejnašne ljubavi trgaju se  
hiščeju se  
prebiraju se  
cvetje mej sobom zaklinja se  
vu ljubav od zavezivanja do kraja  
vu tem zaklinanju  
zgine Božja prisega  
prirodnog konca.

Mi sme ftrgnjeni konci našega cvetja  
procveli vu cajtu  
mi putujeme z cveteki  
ki nesu dočakali prirodnoga konca.

Ftrgnjeni na križu  
z cvetjem nakindžani  
putujeme k svojemu cvetju.

## Stijen goreči

*T*voje milostive oke  
Pelja me vu slatkoču žitka  
čerlene rože naj cveteju  
kap po kap žitki idu z nami  
obilje žitka.

Krv se rascvela  
čez prohodne žile  
čez glatke i čiste stijenke  
svetleči žižki vu mraku  
mati vu stijen gureči gledí.  
Naša Mati.

Kalvarijski breg drži našu žmefkoču  
postaje nojsime vu sebi  
travčice se mecaju  
listeki cunčeju se.

Žitek  
ti imaš navek pred očimami  
za me čisle prebiraš  
vu stijen gledíš  
vu stijen gureči gledíš.  
Naša Mati.

## Vali se valaju

*V*ali se valaju  
vetri se pojaju  
morske struje struiju  
oblaki zemlu obhajaju

Stari oko milosti pone opajaju  
Sveti Ilija vozi kučiju  
stvorenja premeščaju se  
z kraja vu kraj

Mi prizublavame  
priplavame  
sorterame  
stvaranja i dogovaranja  
su nam otprta  
kak nam je i Tvoje svetle otprte  
na trdem tlu.

## **Poseduvati vupanje**

*Lepe* je imeti segurnost

Lepe je živeti da se vu nekoga vupaš  
Gda imaš Tega komu se moreš potožiti  
Tega komu moreš vse tenje pripovedati  
Tega komu nije žmefke vse spovedi prijeti  
Tega ki za pokoru gladi z molitvenem perem

Poseduvati Tega ki je lejk vu betege

Gda imaš Tega ki vu naš žitek sebe vudela  
Imeti takvoga sprevodnika ki nas po zemle pela  
Za naše prenašanje žitka z kolena na kolene  
Vu tem vupanju prehajame po zemle

Kak je lepe imeti vupanje.

## Melini meleju

*K*ak je lepe nadeluvati Mir  
savesti dati do znanja  
drbnuti osečaj  
da sme svoji  
da sme stvorenja

Skupa dišeme isti zrak  
v sake meste ne vidi Tvoj dah  
obitavaš, zalevaš, dišeš, sušiš  
Tvoji proračuni su detaljni i točni

Melini meleju  
Detinstve zbira pot  
negdo vu žleb , negdo vu kole  
negdo vu grot

Melini meleju  
Nadeluvatelov mir.

## Spomenek žitka

*N*ova steza mej stare hraste  
pluča pehal veter  
dekle na klupa imele  
šestinske ambrele.  
Hitale su se reči  
budna zvona čkomela  
cunj kale čisle oko vrata  
vulica puna starih zanata  
vu najzanatovanijem gradu srejne Evrope

Fletni cajti z kušleci na klupa sedeli  
zavetovali svoje spomenke  
vu stezu  
vu kamenita vrata  
vu prostranstva nebeska.

Z katedrale Uznesenja Blažene Djevice  
oglasila zvona  
vrapci su se po nakli razleteli.  
Golubi otprhali mej nebeske obloke.  
stari hrasti  
su svedočanstva  
Steza me pelja vu fondument  
gde me cicaju vodene žile  
mej spomenke žitka.

## Podragane hridine

Val zaplusne, zabuši  
Oblejane hridine  
Cajt za cajtem bučka  
Zdena bura čez pečinje fučka  
Vulkani zbudiju zvire z glibine morske  
Valaju se vetri gorski  
Pluskaju se morja  
Gotaju bogčiju  
Rapave kamenje z vode strši  
Val se z valem mele  
Žiški glodaju posolene kamenje  
Po doge razidene obale  
Voda pluska  
Babe tropaju z flakom po koritu  
Gda na poteku robu pereju  
Nasad privinul zemlu pri kraju  
Žitek zginul  
Po zemlenom podu  
Sonce greje furt  
Oblučje zemljane zakriva  
Kak se bu voda vumirila  
Gda se vetri ne vumiriju?

Podragani sme Gospone vu Tvoje reči

## Proščenari

*Z*a vse proščenare na potu  
za vse stare i nove  
za vse svoje

za vse živuče  
za vse pokojne  
zo sveh stran dohajajuče

zgotovlenu molitvu  
znovič započinjem.



## Lampaš

*R*astepene  
rasipane  
posipane  
pokošene  
posušene  
pobirane  
prizublavame  
žitek živime  
luvime  
prispravlame

Žiške svetleče  
kukce nočne svetleče  
puspravlame vu Lampaš

Lampaš Tvoj svetleči  
Bože!

## **Kak nam Bogek da**

*P*obediti sam sebe  
Poštene živeti  
Biti jak, jakši, još jakši.

Pobediti samoga sebe  
Biti najjakši  
Lampica svetlečega žiška vu nami pišči:  
Poverenje, razum  
Svetle.

Naš Gospun daje  
Dobrem i zločestem jednak.

Zname kaj na tišči i  
Gdo kaj taji.

Ti znaš  
Kaj oni ne znaju  
Močen siromak.  
Pak te hiščeju  
Poradi čega si takov:  
Kak nam Bogek lepi žitek je dal.

## Zahvalna steza

*M*am z dvorišča mej prigorske brege  
Posložena drva iza škegnja  
Velvaju toplinu.

Kukuriza počela dobivati vitice  
Bažul kolenc  
Črlene, bele i plave cveteke  
Kak i naše misli obojane.

Dihalin podiši  
Vu vsake biljke aromu dišeću vuseti  
Gruntanje nije tkanje života  
Odgovornost djela trjeba prijeti.

Večernja popevka šcuricuv nagovješča  
Grojzdje počele zreleti  
Sliva oslača z modre vu plavu boju  
Zozrjeva žmahnu slatkoču.

Steza me popelala mej letinu Božju, med lucke trude.  
Gruntanje celog leta približile se na korak  
Zahvale, preobraženja Gospodinovog  
Vuznesenje Blažene Device.

Vu tem okružju priroda Božja  
Zagledela datum vu mesecu.

Zahvalni spomen za den ljubavi  
Opet vsakoletna draga poseta  
K velike marijanske meše.

## Razdragani cajti

*P*odenul noge  
podal ruku  
pustil dragost i smešek  
Ona skrita ostala  
vu sercu

Vani  
zdeni veter puše  
blagi lahorek gledí naše žalosne duše  
razdragani smešek  
vu meni  
Ona.  
Majčica.

## Draguolne sebedarje

*P*otrebuvame  
gorušičine zrne vu sebe pustiti  
vu naš gartlic sadnicu zasaditi  
vu naš ružičasti šari nasad  
duha vdehnuti

Denes me trefile  
zakaj sebe dal na dreve

Jastreb spod obločja študera  
vu zdenom tlu jajce  
voloharice zašle mej korenje

Gospone Ti si pelda  
Gospone ti si draguolna ljubav





